

Integrasi budaya harus diterima berhati-hati — Dr. M

um- 7/9/2004: 9 Perdana

KUALA LUMPUR 6 Sept. — Integrasi budaya harus diterima dengan berhati-hati supaya ia tidak menghakis dan menenggelamkan nilai-nilai moral dan kemanusiaan yang diamalkan oleh sesebuah masyarakat.

Bekas Perdana Menteri, Tun Dr. Mahathir Mohamad berkata, semua pihak harus berfikir secara mendalam sebelum menerima apa yang dikatakan integrasi budaya.

“Perluakah kita menerima integrasi budaya jika ia akan menghakis satu budaya yang menyanjung tinggi nilai-nilai moral?” tanya beliau.

Dr. Mahathir berkata demikian

ketika berucap mengenai integrasi budaya di Persidangan Kesenian dan Peminat Salleh Tahir (STAFSA) (Salleh Tahir Arts and Fans Association) di Iskandariah, Mesir, hari ini. Teks ucapannya dikeluarkan di sini.

Jelasnya, pertembungan budaya yang berlaku pada masa ini bukanlah satu pertembungan antara agama tetapi pertembungan sama ada untuk mempertahankan nilai moral kemanusiaan atau mengikut tuntutan nafsu.

Dr. Mahathir berkata, pertembungan budaya pada masa ini berlaku kerana beberapa masyarakat termasuk umat Islam tidak

dapat menerima budaya masyarakat etnik Eropah.

“Apa yang ditentang oleh masyarakat Islam bukanlah budaya agama kristian. Ia tidak ada kena mengena dengan agama sama sekali tetapi budaya hedonisme yang mengikut nafsu binatang,” katanya.

Jelas beliau, apabila beberapa budaya bertindih kemungkinan yang akan berlaku adalah sama ada salah satu budaya akan mendominasi budaya yang lain, kewujudan satu budaya campuran yang baru atau percampuran budaya yang boleh menimbulkan konflik pada waktu-waktu tertentu.

“Kecanggihan sistem komunikasi yang menjadikan dunia kini tanpa sempadan juga memerlukan semua pihak untuk mengkaji kemungkinan yang akan berlaku apabila budaya tertentu kian menular di kalangan masyarakat,” kata Dr. Mahathir.

Tambah beliau, semua pihak perlu sedar yang terdapat budaya yang boleh diintegrasikan dan pada masa yang sama terdapat budaya yang tidak boleh diterima oleh beberapa masyarakat.

“Budaya-budaya yang tidak dapat diterima ialah mengiktiraf amalan homoseksual dan hubungan seksual di antara adik-beradik,” kata Dr. Mahathir.

Menyentuh mengenai Malaysia, beliau berkata, Malaysia yang mempunyai masyarakat berbilang agama dan budaya mengamalkan sikap bertolak ansur dan saling menghormati di antara satu sama lain.

“Biarpun formula Malaysia mungkin tidak boleh diamalkan di semua negara berbilang kaum apa yang boleh kita pelajari ialah semangat toleransi merupakan salah satu tunjang kepada integrasi budaya,” katanya.

Tidak ada satu budaya yang boleh mendominasi budaya lain dan ini merupakan satu polisi yang perlu diutamakan, tambah Dr. Mahathir.